

Üna piuniera chi'd es ida in schmanciaunza

Cun l'ouvrà «Fruonzla» d'eira Clementina Gilly (1858–1942) dal 1926 la prüma duonna chi ho publicho ün cedesch in rumauntsch. La poetessa e piuniera dal muviment feminist da sieu temp es morta hoz avaunt 80 ans. In seguit è'la ida in schmanciaunza, ma ün nouv cedesch la dess darcho mner inavous illa memüergia collectiva.

MARTIN CAMICHEL/FMR

«Clementina Gilly moura als 21 november 1942 a las 10.30 a Zuoz ed uschè taschan sieus pleuds in quist di fraid d'utuon, düräunt cha'l sulagl splendura in sieu üert.» Cun quist citat, d'un artichel dad *Edith Prescott*, ho *Rico Valär* bivgnianto in sanda passeda a la commemoraziun per Clementina Gilly. Passa 40 persunas sun seguidas a l'invid e vu-livan gnir a savair dapù da la poetessa zuozingra main cuntschainta. La seletta illa che-sa da scoula da Zuoz d'eira quasi plaina ed i'l ram da la commemoraziun es eir gnieu pre-schanto il nouv cedesch «Clementina Gilly: Traunter di e not».

Quista nouva ediziun es gnida procureda e commenteda da *Rico Valär*, professer da rumauntsch a l'Universited Turich, in collauraziun cun *Annetta Ganzoni*, collauratura scientifica a l'Archiv litterar svizzer, ed *Edith Prescott*, chi ho marido ün descendant da la sour da Clementina Gilly. «Clementina Gilly: Traunter di e not» es üna tscherna da poesias, essais e raquints tradüts da l'autura zuozingra.

Poetessa, traductura, schurnalista e publicista

Clementina Gilly es naschida in üna famiglia da randulins c'ls Gillys vaivan affers a Modena. Dal 1875 es tuot la famiglia turneda a Zuoz, inua cha Clementina Gilly ho passanto tuot sia vita. Ella nu s'ho mè marideda e nu vaiva neir üngüns iffaunts. Pür a partit da 50 ans ho ella cumanzo a s'ingascher per la litteratura e la cultura rumauntscha scu poetessa, traductura, schurnalista e publicista. «Da sieu temp – ed eir our da la perspectiva odierna – es Clementina Gilly üna poetessa singulera. Na be per l'Engiadina, dimpersè per tuot la Ruman-tschia», ho dit *Rico Valär*.

«Fruonzla», Clio ed Annemarie Schwarzenbach

Cun «Fruonzla» ho la poetessa Clementina Gilly publicho dal 1926 il prüm cedesch rumauntsch scu duonna. Clementina Gilly s'ho però eir missa aint per la pusiziun e scolaziun da las mattas in Engiadin'Ota e vela scu pionie-ra dal muviment feminist da sieu temp. Da-fatta la cuntschainta autura e fotografa Anne-



I'l ram d'üna commemoraziun per il 80evel di da mort da Clementina Gilly ho Rico Valär preschanto il nouv cedesch «Clementina Gilly: Traunter di e not».

FOTOS MAYK WENDT



Clementina Gilly – fotografeda dad Annemarie Schwarzenbach l'an 1938 – davaunt sia chesa.



Rico Valär, Annetta Ganzoni ed Edith Prescott pre-schaintan üna tscherna da texts da Gilly.

marie Schwarzenbach es gnida a Zuoz ed ho fat üna documentaziun da Clementina Gilly l'an 1938. Düräunt sia vita ed eir zieva ch'ella es morta ho que do divers rapports da Clementina Gilly in diversa pressa. Ma i'l 80 ans daspö sia mort e'la ida ün pô in schmanciaunza. A persunas, chi sun idas a Zuoz illa scoula prima-

ra, pudess Clementina Gilly listess esser cuntschainta – e que sainza vulair. Sülla tuor da la scoula as rechatta nempe ün versin, güst dasper il purtret dal Sench Georg chi coppa ün dragun: «Per il bön/sforz cumön/ed al mel/cuolp mortel». Firmo es il versin cun Clio, il pseudonim da Clementina Gilly.

Our da la «not da la schmanciaunza»

Eir scha *Rico Valär* es creschieü sü a Zuoz, nu'l d'eira la poetessa Clementina Gilly taunt cuntschainta. In ün'intervista cun la FMR ho'l quinto cur ch'el la ho scuviert ed eir davart motivs pussibels perche ch'ella es ida in schmanciaunza.

MARTIN CAMICHEL/FMR

FMR: El ho manzuno düräunt Sia pre-schantaziun cha Clementina Gilly saja ida a perder illa «not da la schmanciaunza» e ch'el la vuless darcho mner i'l «di da la memoria collectiva». Cura d'eira alura Sieu prüm contact cun la poetessa?

Rico Valär: Ma sper il versin sülla chesa da scoula da Zuoz – il quôl ella ho scrit e pubblico suot il pseudonim Clio – d'eira il prüm contact düräunt ils cuors da rumauntsch da sted da la Chesa Planta. Eau nu m'algord pü precis da che an cha que es sto, ma lo vainsa organiso üna spassageda poetica tres Zuoz. Per quella spassageda vainsa tschernieu di-versas poesias d'auturas e d'auturos zuozinghers ed essans ieus tar lur chesas a preler las poesias. Lo am e'la darcho inscunreda ed eau vulaiva zieva gnir a savair che cha que do tuot dad ella. In seguit d'heja chatto ün artichel illas Annalas da Domenica Messmer e lo d'he scuviert las poesias. Uschè ho cumanzo tuot l'interess per Clementina Gilly.

Clementina Gilly d'eira la prüma duonna chi ho publicho ün cedesch rumauntsch. Che significhescha que per El scu Zuozingher?

Eau d'eira già adüna collio cun poets zuozinghers e m'he già adüna interesso per

quals. Uschè m'ho Artur Caflisch già interessò düräunt la scoula. Il fat il pü bel davart Clementina Gilly es ch'ella es üna poetessa chi'd es ida in schmanciaunza – ma cun la distanza dal temp as boda uossa quaunt ac-tuel, quaunt importante e quaunt interes-santa ch'ella es. Eir scha que ho già do duon-nas rumauntschas – scu per exampel a Julia Braun Brunies – chi haun scrit pü bod poe-sias illa giazetta cu Clementina Gilly, es ella la prüma duonna chi ho publicho ün cedesch. E que's po sgürischem dir ch'ella d'eira la prüma duonna rumauntscha chi ho giu-ue ün tschert renom scu autura.

El ho lavuro a Turich, Annetta Ganzoni a Berna ed Edith Prescott in Canada.

Quaunt lönch es que ieu a metter insemel l'ouvrà?

Normalmaing as fo ediziuns e reediziuns da poets e poetessas già cuntschaints. Cun Clementina Gilly vainsa giu l'occasiun da fer ün nouv cedesch da qualchün chi'd es ieu in schmanciaunza, que d'eira fach bel. La pü granda lavur d'eira da ramasser insomma tuot il materiel chi'd es intuorn. Alura as vai-va da ler quel, d'al selezioni e zieva digitalisier que che cha's vulaiva druber pel cu-desch. Uschè as vaiva alura üna votua üna part da l'ouvrà. Ma que as vaiva eir da ler e selezioni ils documaints persunels, ils dia-

ris, las correspondenzas ed eir las fotografias. Ed a la fin d'eira alura aucha la creaizun dal cedesch scu tel. Tuot in tuot varonsa gieu var duos ans.

Adonta sia rolla da piuniera e sia renomi-na es Clementina Gilly ida in schman-chaunza zieva sia mort dal 1942. Che sun tenor El ils motivs ch'ella nun es pü illa memüergia collectiva?

Eau pens cha que ho gieu da che fer cul fat ch'ella d'eira üna duonna e ch'ella ho publicho suot ün pseudonim. I'l canon litterar da tuot las litteraturas europeicas sun las duon-nas suvenz idas a perder. Impü ho ella publicho per granda part in giazettas, revistas e lös chi d'eiran zieva la mort difficultaing acces-sibels – materiel ch'üngün nun ho neir ramasso. Ün ulterior motiv saro ch'ella d'eira üna poetessa aünz las duos guerras mundiales. Zieva la Segunda Guerra mundiela s'ho gieu üna nouva generaziun da poets e poetessas e quels haun gieu nouvs interess e nou-vas tematicas. Uschè cha la generaziun da Clementina Gilly nun es pü steda uschè ac-tuel. Ma eau craj listess ch'una Luisa Famos u eir üna Irma Klainguti – scu poetessas da generaziuns pü giuvnas – d'eiran influenze-das dal fat cha que daiva eir aünz ellas poetessas rumauntschas predschadas ed arcu-gnuschidas.

VALSOT

Radunanza ha approvà la revisiun da la planisaziun

La radunanza cumünal da Valsot ha approvà il venderdi la revisiun totala da la planisaziun cumünal. Da discutar ha impüstut dat la fabrica d'ün parkegi illa fraczin da Ramosch. Daspö la fu-siun da Ramosch e Tschlin avant 10 ons nun exista ingüna led-scha da fabrica cumünavila. Perquai es la revisiun totala statta necessaria. Sco prossem pass ha la regenza grischuna da dar seis acconsentimaint a quista revisiun. (rtr/fmr)

SAMEDAN



L'hotel Terminus güsta dasper la stazion da Samedan es gnieu vendie a la Banca Raiffeisen Engiadina Val Müstair.

FOTO RTR

La Banca Raiffeisen cumpra l'hotel Terminus

La Banca Raiffeisen Engiadina Val Müstair ho cumpro l'hotel Terminus e realisescha lo üna nouva filiela da banca.

Daspö 22 ans as rechatta la filiela da la banca Raiffeisen i'l center da la vschinauncha da Samedan. Il local es però pitschen e stret – e la banca es fitadina da quel local. Perque nun hegia la Banca Raiffeisen Engiadina Val Müstair stüdgio duos voutas cur ch'ella es gnida a savair cha l'hotel Terminus güst dasper la stazion da Samedan es vnel. Que ho *Thomas Malgarietta*, directur da la Banca Raiffeisen Engiadina Val Müstair dit invers RTR.

Cha cler saja intaunt ch'as vuless realiser üna nouva filiela banca in l'edifizi. Tuot il rest saja aucha aviert. Scu prossem ve-gna fundeda üna gruppa da lavur chi gnaregia ad elavurer ün pro-get. Fin in settember 2023 restan l'hotel ed il restorant però aucha aviert. (rtr/fmr)

ENGIADIN'OTA

Arresto sprayer e leder

In Engiadin'Ota ho la pulizia sclerieu püs delicts, scriva la Polizia chantunala in üna comunicaziun. Daspö l'october 2021 ho que do a Puntraschigna, a Samedan ed a San Murezzan adüna darcho polluziun vi d'ogets ed invöls da vapuriseders da spray. Uossa ho la pulizia arresto ün hom da 42 ans. Il Tudas-ch ho la-scho valair d'avair invulo vapuriseders da spray e d'avair fat in tuot 28 graffitis vi d'edifizis e cumposiziuns da tren. Il dan ma-teriel munta a püs 10 000 francs. (rtr/fmr)

REFURMO ENGIADIN'OTA

Lucian Schucan dess surpiglier il presidi

Lucian Schucan da Zuoz dess surpiglier l'uffizi da president da *Gian Cläuña*. Quel vaiva surpiglio l'incum-benza avaunt ün an zieva cha *Gian Duri Ratti* vaiva demischieno. L'elec-zioni ho lö in mardi, ils 22 november a Zuoz. Sper ün nouv president sun eir d'occupar trais sezis illa suprastanza. Ün post d'eira vacant daspö la fin 2021 e duos commembres haun de-mischieno. La cumischien da recrutaziun propona a *Monika Urech*, *Susanna Schild* e *Michael Pfäffli*. *Aita Bi-vetti* e *Marius Hauenstein* as mettan a disposiziun per la reelezioni. (rtr/fmr)



Lucian Schucan da Zuoz dess gnir nouv president da la raspeda evangeli-a.